

Die Bopla 20 JUL 1992

SA verstewig sy bande met Mosambiek

Deur Theuns van der Westhuizen

BETREKKINGE tussen Suid-Afrika en Mosambiek het die naweek verder verstewig met samesprekinge tussen pres. F.W. de Klerk en pres. Joaquim Chissano.

Verskeie sake van bilaterale belang, asook sake wat vir vrede en die vooruitgang van die hele Suid-Afrika van belang is, is Saterdag in Maputo deur hulle bespreek voordat pres. Chissano die bekende Polana-Hotel heropen het.

Die Polana-Hotel is sowat 17 jaar gelede gesluit toe Frelimo die land oorgeneem het. Dit is nou teen sowat R44 miljoen gerestoureer in 'n gesamentlike projek van 'n Suid-Afrikaanse maatskappy en die Mosambiekse regering.

Pres. De Klerk en pres. Chissano het ná die opening van die hotel op 'n perskonferensie bekend gemaak dat van die belangrike sake aandag gekry het, die volgende is:

- Die skepping van 'n gesamentlike taakgroep om die kwessie van die repatriasie van Mosambiekse vlugtelinge uit Suid-Afrika te ondersoek en te hanteer;

- Nuwer samewerking op handelsgebied, veral wat betref die uitvoer van Suid-Afrikaanse goedere deur Mosambiek en die belangrikheid van die ekonomiese integrering van Suid-Afrika;

- Die ondertekening van 'n handels-ooreenkoms binne die afslentbare toekoms tussen die betrokke twee ministers van buitelandse sake; en

- Die grondwetlike prosesse in albei lande en wedyersydse ondersteuning, sonder inmenging, om die prosesse te bevorder.

- Die kwessie van AK 47-gewere wat Suid-Afrika uit Mosambiek binnekom en knaende beweringe oor

Suid-Afrikaanse steun aan Renamo het ook onder die loep gekom.

Pres. De Klerk het op die perskonferensie gesê daar bestaan 'n persepsie dat die Regering nie in beheer van die Veiligheidsmagte is of hul steun het nie. "Dit is onsin. Daar bestaan 'n goeie verhouding tussen die Regering en die Polisie en die Weermag."

Daar steek ook geen waarheid in die aantygings dat daar 'n sinistere kabaal binne die Veiligheidsmagte is wat teen die wense van die Regering optree nie. Daar is ook reeds bewys dat daar geen spesifieke Derde Mag in die Veiligheidsmagte bestaan nie.

Individue in die Magte oortree van tyd tot tyd om verskeie redes, soos oral ter wêreld, en daar word sonder aansien des persoons teen hulle opgetree.

Beweringe dat Suid-Afrika Renamo steun, is ongegrond. Die saak is met pres. Chissano bespreek en die Regering is daarvan oortuig dat geen Suid-Afrikaanse agent of organisasie steun aan Renamo gee nie. Dit kan wel wees dat Renamo goedere uit Suid-Afrika ontvang wat hy van individue koop wat weens die omvang van die vryemarkstelsel moeilik vasgetrek kan word.

Pres. Chissano het gesê hy aanvaar pres. De Klerk se woord, maar hy het inligting uit verskeie bronne van tekens van kontak tussen Suid-Afrikaanse individue en Renamo.

Pres. De Klerk het hierop gereageer deur te sê Suid-Afrika het ook 'n probleem met AK 47-gewere wat die land uit Mosambiek binnekom, maar hy het begrip daarvoor dat pres. Chissano altes in sy vermoë doen om dit te keer. Daar kan nie verwag word dat pres. Chissano moet weet wat elke individu doen nie.